



منوچهر عزیزی (هارای)

ایراند رادیکالیزم سونا چاتماقدا دیر

ایرانا غربین کئشمه کئشلی آغیر تضییقلری داوامیندا هاشمی رفسنجانی نین داهیلر (خبرگان) مجلسینین باشچیلیغینا سئچیلمه سی ایله، ایران حاکمیتی نین رادیکال سیاستی نین سونا چاتماسی احتمالی کیمی تصور ائتمک، هئچده غیر نورمال دئییلدیر. آمئریکا و طنداشلاری اولان ایرانی ژورنالیستلرین گویا جاسوسلوق اتهامی ایله حبس اولونانلارین درحال بوراخیلماسی، ایرانین آتوم تهلوکه سینین درحال کؤلگه یه بوراخیلماسی، عیراقد آغیر توقوشمالارین نسبی حالدا ساکیت لشمه سی، یوخاریداکی نظریه نین دوزگون اولماسینین ثبوتی کیمی ده گرلندیرمک اولار.

بئله بیر مهم سیاسی دونوش نقطه لرین حیاتا کئچمه سی ایله، رژیمین حاکمیت سویه سینده قیسا بیر پروسس کیمی تصور ائتمک چتین دیر و هاشمی رفسنجانی نین سیاسی حیاتی گؤسته ریر کی او، حاکمیتین بوتون کئچیدلرینی آشراق، قدرتین ان سون زیروه سینده یوکسلمک مقصدینی گؤدور. اونسوزدا اصلاحات و رادیکال مرحله لریندن سونرا، اورتاق سیاستین حیاتا کئچمه سی اوچون هاشمی رفسنجانی دن باشقا رژیمین سیاسی شاهمات صحنه سینده اؤنملی مؤهره سی قالمامیشدیر.

آمئریکانین ایراند ایره لی لمیش بئله بیر سیاسی افلاسلا راضی لاشماسی، اونون اورتا شرقده تۆرنمیش تهلوکه لی وضعیتدن یاخا قورتارماسینا، ایراند نسبی صورتده رادیکال حرکاتین آزالماسینا، عمومیتله دونیادا تروریزمین قارشیسینی نین آلینماسینا یاردیم ائده بیلر. آما سیاسی صحنه ده دفعه لرله میللت طرفیندن رد ائدلمیش هاشمی رفسنجانی، رهبرلیک خولیاسیندا نه اینکی درین ریسکه شوبهه ایله یاناشمالیدیر، بلکه مصباح یزدی، جنتی و اونلار فوندا منتال آیت الله لاری، سپاه، بسیج و شهیدلر و محاربه افلیجلی عائله سینى هله ده آنتی آمئریکا و اسرائیل سیاستی آدی آلتیندا، اونون رهبرلیک سویه سینده یوکسلمه سی نین چوخ جیدی مانع کیمی قابارمالارینی حیاس ائتمه لیدیر. دها دوغروسو آنتی آمئریکا و آنتی اسرائیل شوعارلاری ایله بوگونه دک دوام ائدن اسلام حاکمیتی، ۱۹۰ درجه لی دؤنوشله قیسا بیر مرحله ده هاشمی رفسنجانی نین سیاسی مقصدلری ایله راضیلاشمایاجاقدیر. باشقا تقدیرده اونو مخملی یا نارینجی بیر کودتا کیمی قیمتلندیرمک هئچده یانلیش اولمازدی. لاکین ایران نه اوکراینادیر و نه ده گورجوستان. چونکی ایرانین سیاسی تاریخینین کولتور و مدنیتی بام باشقادیر، یعنی ایرانین سیاسی تاریخینده هئچ بیر زامان دموکراسیایا دوغرو کئچید دورانی ایره لی گلمه میشدیر.

ایراندایاشایان میللتلر هله ده اوزون ایللر بویوندان بری شاهلیق اصول اداره سینین شوونیتسی حرکتیندان توتوموش، ایران اسلام رژیمین ارتجاعی داورانیشلاری نین آغیر تحقیرلرینه معروض قالماسی، ایقتصادی، ایجتماعی، سیاسی و کولتوره ل وضعیتین برباد وضعیته دوشمه سی، آغیر ایشکنجه لر، اعداملار و آنایاسادا میللته حصر اولونان حوققلارین دوندورولماسی و مینلر موجود پروبلملر، غربین یاشیل چراغیلا هاشمی رفسنجانی نین سیاسی رهبرلیک وظیفه سینه یوکسلمه سی، میللتین راضیلیغینا اینام یارادا بیلمه یه جکدیر.

اگر غرب اورتا شرقده اؤز منافعینی گودمک مقصدیله بئله بیر تشبوثلره معروض قالیرسا، مومکوندور کی، قیسا زامان اوچون قناعت بخش اولسون. لاکین استعمار آلتیندا یاشایان میللتلر، هر هانسی بیر قدرتین ایراده سیله، اؤزونون سیاسی- ایجتماعی پلانلاری نین قورولماسینا راضیلاشماپاجاقدیر. چونکی ۱۳۸۵- جی ایلده آذربایجان میللتی نین خورداد قیامی بیرداها ایراندایاشایان میللتلره و دنیا قدرتلرینه، هابئله موجود رژیمه اثبات ائندی کی بو میللت جیدی صورتده قدرتلی دموکراتیک اداره چی لیگینه مالیکدیر.

ایسوچ- مالمو
۲۰۰۷-۹-۵